

Wolof - Xelum Xeexe Mbind - SW Intro Scriptures

Luug 17:5 Ndaw ya wax Boroom bi ne ko: «Yokkal sunu ngäm.»
Room 10:17 Kon boog ngäm ci kaw dégg lay juddoo, te dégg sosoo ci
xebaru Kirist.

Luug 11:1 Am bés Yeesu di ñaan ci benn bérab. Bi mu noppee, kenn
ci taalibeem yi ne ko: «Boroom bi, jàngal nu, nan lanu war a ñaane,
ni ko Yaxya jàngale ay taalibeem.»

1 Timote 2:1-4 Fii laay tàmbale nag: maa ngi leen di dénk, ngeen
yóbbu ñépp fa kanam Yàlla ciy ñaan, ay tinu ak i ngérém. 2 Ñaanal-
leen buur yi ak kilifa yépp, ngir nu man a am dund gu dal te jàmmu,
ànd ak ragal Yàlla ak faayda yu mat. 3 Loolu mooy li rafet te neex
Yàlla sunu Musalkat, 4 bi bëgg ñépp mucc te xam dëgg gi.

Luug 22:31 Yeesu teg ca ne: «Simon, Simon! Seytaane ñaan na, ñu
jébbal leen ko, ngir mu teqale leen ni ñu teqalee dugub ak xatax.

Sakariya 3:1,2 - Yudd 1:9 Waaye bi Mikayel, miy kilifa ci malaaka yi, di
xëccook Seytaane néewu Musaa, bay xuloo ak moom, ñemewu koo
àtte, boole ciy xas; mu yem ci wax ko ne: «Na la Boroom bi
mbugal!»

Efes 6:12 Ndaxte ndëndu xare jib na, waxuma sunu diggante ak nit ñi,
waaye ak kilifa yiy nëxal àddina si, ñuy kilifa yi ak ay boroom sañ-
sañ, di gaayi Seytaane yi ci bérab yu kawe yi.

Efes 6:10,11 Léegi nag doolewuleen ci Boroom bi, te soloo kàttanam
gu mag gi. 11 Gànnayaoyoleen yérey xarey Yàlla yépp, ngir man a
jànkoonte ak pexey Seytaane.

Efes 6:13-17 Kon nag gànnyaoyoleen yérey xarey Yàlla yépp, ba man
a jánkoonte jamono ju xeex bi taree, noot lépp te taxaw temm. 14
Taxawleen kon temm, geñoo dëgg te sàngoo njub, muy seen
kiiraayu dënn. 15 Solooleen jàmm, ji xebaar bu baax biy joxe, ni ay
dàll ci seeni tànk, ba jekk ci lépp. 16 Defleen it ngäm, muy seen
pakk, ba man a fél jum yi leen Seytaane di fitt. 17 Defleen mucc,
muy seen mbaxanam xare, ak kàddug Yàlla, muy jaasi ji leen Xel
mu Sell mi tèggal.

Yawut Ya 4:12 Xam nanu ne, kàddug Yàlla mi ngi dund te am na
doole. Moo gën a ñaw jaasiy ñaari boor. Day dagg ba fa xol ak xel
digaloo, ba fa yax yi ak yuq gi di teqalikoo, te man na àtte xalaat yi
ak mébéti xol.

Luug 4:8 Yeesu tontu ko ne: «Mbind mi nee na: "Nanga màggal Yàlla

sa Boroom te jaamu ko moom rekk.”»

Efes 6:18 Deeleen ñaan ci xeeti ñaan yépp ci kàttanu Xel mu Sell mi, te sax ci ak farlu gu mat sëkk, di ñaanal gaayi Yàlla yu sell yi yépp.

1 Samwil - 1 Samiyel 17:45-47 Daawuda ne waa Filisti ba: «Yaw de yaa may jélal ab saamar ak xeej ak jaasi, waaye man li may xeexeek yaw mooy turu Aji Sax jiy Boroom gàngoori xare yi, di Yàllay mboolooy xarey Israyil, mi nga tékku. 46 Bésub tey jii Aji Sax ji dina la teg ci samay loxo. Dinaa la rey, dog sa bopp. Tey jii laay def mbooloom waa Filisti ay néew, njanaaw yeek rabi àll yi yàpp. Su ko defee àddina wérngal këpp xam ne Israyil am na Yàlla. 47 Te itam mboolem ñii fi daje dinañu xam ne du saamar mbaa xeej la Aji Sax jiy musalee, ndax Aji Sax jeey boroom xare bi, te dina leen teg ci sunuy loxo.»

Luug 10:17-20 Juróom-ñaar-fukki taalibe yi ak ñaar dellusi, fees ak mbég te naan: «Boroom bi, rab yi sax déggal nañu nu ndax sa tur.» 18 Yeesu ne leen: «Maa ngi doon séen Seytaane wàcce asamaan ni safaras melax. 19 Gis ngeen, jox naa leen sañ-sañu joggi ci jaan yi ak ci jiit yi, daan dooley bañaale bi, te dara du leen man a gaañ. 20 Moona li leen rab yi déggal, bumu tax ngeen bég, waaye bégleen ndax li ñu bind seen tur ci asamaan.»

2 Korent 10:3-5 Dëgg la ne nit rekk lanu, waaye dunu xeexe ni nit. 4 Ndaxte gànnaay, yi nuy xaree, jógewuñu ci nit, waaye ca Yàlla lañu jóge, te ànd ak kàttan, ngir daaneel ay tata. Danuy daaneel xalaat yi dul dëgg 5 ak bépp tiitar buy jànkoontek xam-xamu Yàlla, te danuy noot bépp xalaat, ba mu déggal Kirist.

Macë 16:19 Dinaa la jox caabiy nguuru Yàlla Aji Kawe ji; li nga yeew ci àddina, dees na ko yeew ci asamaan; li nga yiwi ci àddina dees na ko yiwi ci asamaan.»

2 Timote 1:7 Ndaxte Xel mi nu Yàlla sol du ànd ak ragal, waaye day ànd ak kàttan, mbëggeel ak moom sa bopp.

Macë 12:28,29 Waaye bu fekkee ne ci Xelum Yàlla laay dàqe rab, kon nguuru Yàlla agsi na ba ci yéen. 29 «Su fi amee nit ku bare doole, te nit bëgg a dugg ci këram, nangu alalam, naka la koy defe? Xanaa dafay jëkk a yeew ku bare doole ka, ba noppi door a toj këram gépp.

Efes 1:13 Te yéen itam, bi ngeen déggee kàddug dëgg gi, di xebaar bu baax, bi leen tegtal yoonu mucc, te ngeen gëm ko, Yàlla tåmpe na leen ni ñoñam ak Xel mu Sell, mi mu dige woon.

Jëfi Ndaw 19:6 Te bi leen Pool tegee loxo, Xel mu Sell mi ñëw ci ñoom, ñuy wax yeneeni làkk, di wax ci kàddug Yàlla.

Màrk 16:15-18 Mu ne leen: «Demleen ci àddina sépp, yégal xebaar bu baax bi mbindeef yépp. 16 Ku gëm te ñu sóob ko ci ndox, dina mucc; ku gëmul, dees na ko daan. 17 Ñi ma gëm dinañu ànd ak firnde yii: ci sama tur dinañu dàq rab yi, di wax làkk yu bees, 18 di jàpp jaan ak seeni loxo; te bu ñu naanee lu ñu tooke, du leen wàññi dara, te jarag ju ñu teg loxo, mu wér.»

1 Yowaana 1:9 Su nu nangoo sunuy bàkkaar ci kanamam, fekk kuy sàmm kóllëre la te jub, ngir baal nu sunuy bàkkaar te sellal nu ci lépp lu jubadi.

Goreel ga - Mucc ga 20:5 Buleen ci sujjóotal lenn te buleen ci jaamu lenn. Ndax man seen Yàlla Aji Sax ji, Yàlla ju fiir laa, te dinaa topp doom tooñu waajuram, be ca sét yaak sëtaati ka ma noonoo.

Sabóor 109:17 Moo bëggoon di móoloo, yal na ko këppoo; soppul ag ñaan it, yal na ko barke sore.

Àtte 16:16 - 2 Piyeer 2:7,8 Waaye musal na Lóot mi jub, mi sonnoon ndax ñaawteefi ñu dëng, ñooñu mu nekkaloon. 8 Ndaxte Lóot, mi dëkkoon ci seen biir, dafa dëkke woon tiisu xol, ndax ñaawteef yi mu gis ak a dégg guddi ak bëccëg.

Efes 4:26 Ku mer, bu mu jàll aw kaañ; bu jant bi sowaale seen mer, Room 14:12 Noonu ku nekk ci nun dinga làyyi fa Yàlla ci lépp loo mas a def.

1 Yowaana 2:23 Ku weddi Doom ji, amuloo itam Baay bi; ku seedeel Doom ji, am nga it Baay bi.

Yowaana 14:6 Yeesu ne ko: «Man maay yoon wi, maay dëgg te dund it man la. Kenn du ñëw ci Baay bi te jaarul ci man.

Macë 11:28-30 «Ñëwleen ci man, yéen ñépp ñi sonn te diis, dinaa leen may noflaay. 29 Jébbaluleen ci man te jàng ci man, ndaxte lewet naa te woyof, te dingeen am noflaay ci seen xol. 30 Ndaxte sama kilifteef lewet na te sama yen diisul.»

2 Korent 6:2 Ndaxte Yàlla nee na: «Ca jamono ja mu jekke, nangu naa sa ñaan; ci bésu mucc gi laa la wallu.» Tey jii la jamono ju jekk ji; tey la bésub mucc gi.

Room 10:13 Ndaxte bind nañu: «Képp ku woo Boroom bi ciw turam, dinga mucc.»